

Transkription von Urkunde HST 1368a

Ort, Datierung: Stralsund, 1368-04-03

Signatur: Stadtarchiv Hansestadt Stralsund, StU 0442 [\[online\]](#)

Inhalt: Gebrüder Vos: Söldnerdienst

Wy cla(wes) , brünyng , vnde vicke brodere gheheten vos bekennen vn(de) betūghen / in desser yeghenwardighen scrift dat wi mit vnsen vrūnden alse mit / ridd(er)en vn(de) guden lūden de thome schilde vn(de) helme ghebōren sin der / veerteyne mit helme(n) wesen schōlen vn(de) sōs schūtten mit ereme vulle(n) / harnsche Denen schōlen Den erliken luden den ratmanen der / stad tome stralessunde van paschen neghest anstande wente des / neghesten daghes sūnte michels des hilghe ertze(n) enggels uppe / vse kōste vnde schaden bet in de stad tome straless(unde) vor dessen denst schole(n) se gheuen eme iewelken beyde schutten un(de) wapaner teyn mark suluers to solte de mark sūluers to losende vor veer / sundesche mark Des hebbe wi des gantze(n) zoltes de helfte vnt/fanggen vn(de) is vns bered to der nōghe eer desse bref ghescreuen / ward Vortm(er) u(m)me dat ik cla(wes) vos vorben(omeden) eres kryghes en ho= / uetman wesen schal so scholen se mi gheue(n) Vor myn vōrdel / vif hundert mark sundescher pen(n)yng Der hic ¹ alrede vntfange(n) / hebbe drehundert mark sundesch , Were ener dat der stad / hovetlude dede ouer theen mit mi , seggen went wi wedder / to lande kamen , dat ik en to dangke nicht ghedenet hadde , / so de(n)ne schole(n) se ² hundert mark hir ³ vnder beholden van der / anderen helfte des zoltes de myne vrund vpboren scholen / to sūnte michels daghe Vortm(er) so is dat also dat de / rad vanme sunde vnser vrū(n)d dat halue iar van / sūnte michels daghe wente to pasche(n) vord bedarf to ereme / denste dat schal an en stan , so schole(n) se geue(n) vnsen vrūn/den alsodane(n) zolt alze dar vorscreuen steyt Vnde vm(m)e myn / vōrdeel dat schal stan tome rade van deme sunde vn(de) to / hern reymer mynembrōder de(n) pape(n) in ⁴ alle desse vor(benomed) / stucke lowe wi Cla(wes) brünyng , vn(de) vicke vorben(omede) mit ener / samende(n) hand en trōwen Den borghermest(er)en vn(de) den ratmane(n) / tome sunde stede vn(de) vast toholdende tho ener groter betughinge / desser dyng so hebbe wi vnse Ingheseghele ghehenget heten vor / dessen bref de ghegheue(n) vn(de) screue(n) is vpme rathus tome sunde na godes bord dusent iar drehundere ym(m)e achte vnde / sostigh(esten) iare des neghesten daghes name sūnadach to palmen

¹ *Hic* : *ik* oder *he* ?

² *se* nachträglich übergeschrieben

³ *hir* durchgestrichen

⁴ *in* durchgestrichen